

ZAKON O IZMJENAMA I DOPUNAMA ZAKONA O SUDU BOSNE I HERCEGOVINE

Uvod

Zakon o Sudu Bosne i Hercegovine ("Službeni glasnik BiH", broj 29/00), izmijenjen i dopunjen članom 73. Zakona o Visokom sudskom i tužilačkom vijeću ("Službeni glasnik BiH", broj 15/02), dalje izmijenjen i dopunjen Zakonom o izmjenama i dopunama Zakona o Sudu Bosne i Hercegovine ("Službeni glasnik BiH", broj 24/02) (u daljem tekstu: Zakon), ovim se mijenja i dopunjava kako slijedi:

Član 1.

Član 9. stav 2. Zakona briše se.

Član 2.

Član 13. Zakona briše se i zamjenjuje se novim članom 13. koji glasi:

"1. Sud je nadležan za krivična djela utvrđena Krivičnim zakonom Bosne i Hercegovine i drugim zakonima Bosne i Hercegovine.

2. Sud je dalje nadležan za krivična djela utvrđena zakonima Federacije Bosne i Hercegovine, Republike Srpske i Brčko Distrikta Bosne i Hercegovine kada ta krivična djela:

- a) ugrožavaju suverenitet, teritorijalni integritet, političku nezavisnost, nacionalnu sigurnost i međunarodni subjektivitet Bosne i Hercegovine;
- b) mogu imati ozbiljne reperkusije ili štetne posljedice na privredu Bosne i Hercegovine, ili mogu izazvati druge štetne posljedice za Bosnu i Hercegovinu ili mogu izazvati ozbiljnu ekonomsku štetu ili druge štetne posljedice izvan teritorije datog entiteta ili Brčko Distrikta Bosne i Hercegovine.

3. U nadležnosti Suda je također da:

- a) zauzima konačan i pravno obavezujući stav vezan za provođenje zakona Bosne i Hercegovine i međunarodnih ugovora na zahtjev bilo kojeg suda entiteta ili bilo kojeg suda Brčko Distrikta Bosne i Hercegovine kojem je povjereno provođenje zakona Bosne i Hercegovine;
- b) odlučuje o pitanjima koja se tiču provođenja međunarodnih i međuentitetskih krivičnih propisa, uključujući i odnose s Interpolom i drugim međunarodnim policijskim organima, kao što su transfer osuđene osobe, izručenje i predaja osoba, koji se zahtijevaju od bilo kojeg organa na području Bosne i Hercegovine od strane druge države, odnosno međunarodnog suda ili tribunala;
- c) rješava sukob nadležnosti između sudova entiteta, između sudova entiteta i Suda Brčko Distrikta Bosne i Hercegovine, te između Suda Bosne i Hercegovine i bilo kojeg drugog suda;
- d) odlučuje o ponavljanju krivičnog postupka za krivična djela predviđena zakonima države Bosne i Hercegovine."

Član 3.

U članu 14. stav 2. tačka c), iza riječi: "i sudova Brčko Distrikta", dodaju se sljedeće riječi: "te između Suda Bosne i Hercegovine i bilo kojeg drugog suda".

Član 4.

U članu 15. stav 1. briše se i zamjenjuje novim stavom 1. koji glasi:

"1. Sud je nadležan da odlučuje po:

- a) žalbama protiv presuda ili odluka koje donese Krivično odjeljenje ovog suda;
- b) žalbama protiv presuda ili odluka koje donese Upravno odjeljenje ovog suda;
- c) vanrednim pravnim lijekovima protiv pravosnažnih odluka koje su donijela odjeljenja Suda, osim zahtjeva za ponavljanje postupka."

Član 5.

Član 16., član 17. i član 18. Zakona brišu se.

Član 6.

Član 23. kako je izmijenjen i dopunjen briše se i zamjenjuje novim članom 23. koji glasi:

"1. Upravno odjeljenje sastoji se najmanje od pet sudija.

2. Krivično odjeljenje sastoji se najmanje od deset sudija.

3. Apelaciono odjeljenje sastoji se najmanje od deset sudija.

4. Odjeljenja sude u vijećima sastavljenim od po troje sudija.

5. Od sudije iz drugog odjeljenja može se tražiti da sudi u Apelacionom odjeljenju, osim u Posebnom apelacionom vijeću."

Član 7.

Član 24. st.3, 4. i 5., kako su izmijenjeni i dopunjeni, brišu se i zamjenjuju novim st. 3. i 4., koji glase:

"3. Sudije pojedinačno mogu obavljati i dužnosti sudije za prethodni postupak i sudije za prethodno saslušanje.

4. Krivičnim odjeljenjem predsjedava predsjednik odjeljenja kojeg biraju sve sudije odjeljenja."

Član 8.

Član 32., član 33., član 34., član 35., član 36., član 37., član 38., član 39., član 40., član 41. i član 42. Zakona brišu se.

Član 9.

Član 44., član 45., član 46., član 47., član 48., član 49., član 50., član 51., član 52., član 53., član 54., član 55., član 56., član 57., član 58., član 59. i član 60. Zakona brišu se.

Član 10.

U članu 61. stav 1. riječi: "u skladu s članom 37. ovog zakona" i riječi: "u skladu s članom 57. ovog zakona" brišu se.

Član 61. stav 4., kako je izmijenjen i dopunjen, briše se.

Član 11.

Član 63. i član 64. Zakona brišu se.

Član 12.

Član 65., kako je izmijenjen i dopunjen, briše se i zamjenjuje se novim članom 65. koji glasi:

"1. U prijelaznom periodu može se imenovati jedan broj od najviše šest (6) međunarodnih sudija u posebna vijeća za organizirani kriminal, privredni kriminal i korupciju pri Krivičnom i Apelacionom odjeljenju. Međunarodne sudije ne smiju biti državljani Bosne i Hercegovine ili bilo koje od susjednih zemalja. Prijelazni period može trajati najduže četiri godine.

2. Međunarodne sudije neće se smatrati odgovornim u krivičnom ili parničnom postupku za bilo koju radnju počinjenu u vršenju svojih dužnosti prema ovom zakonu.

Član 13.
Stupanje na snagu

Ovaj zakon o izmjenama i dopunama Zakona o Sudu Bosne i Hercegovine stupio je na snagu 1. februara 2003. godine.